

## **Protocol dalla radunonza communal dils 30 da november 2018 allas 20.15 uras en casa da scola a Breil-vitg**

- Perstgisas:** Maurus Tomaschett, president cussegl da vischnaunca  
Prisca Sgier, cussegliera
- Presenza:** 64 persunas
- Hosp:** Madeleine Grob, planisadra (tractanda 2 e 3)
- Tractandas:**
1. Beinvegni ed approvaziun dil protocol dils 21 da fevrer 2018
  2. Revisiun parziala plan da zonas Ruast
  3. Revisiun parziala plan da zonas Tschuppina
  4. Preventiv e quen d'investiziun 2019
  5. Pei da taglia 2019
  6. Varia

### **Beinvegni ed avertura**

Il president communal, Clau Schlosser, fa a tuts presents in cordial beinvegni, alla radunonza communal. In special beinvegni fa el a dunna Madeleine Grob, ella vegn ad informar la radunonza tier tractanda dus e treis.

Sco emprem informescha il president daco ch'igl ei vegniu fatg ina controlla d'entrada. La nova lescha cantunala da vischnauncas prevesa che la radunonza communal ei publica, e per ch'ins sappi tgi che ha il dretg da votar, havein stuiu far quella controlla, e stuein far quella controlla era egl avegnir.

Il president communal resumescha las lavurs principalas dalla suprastonza dil davos onn. En spezial menziunescha el la lavur supplementara cun elavurar ora las novas leschas dalla nova vischnaunca sco era la lavur supplementara dalla canzlia, dil menaschi technic e forestal. Vinavon informescha el la radunonza sur dil stan actual dalla via da colligiazion denter Vuorz e Breil.

Sco dumbravuschs vegnan Ludvig Desax, Dardin e Andreas Cadonau, Vuorz, nominai ed elegi unanin.

La gliesta da tractandas, ch'ei stada publicada els davos fegls ufficials, vegn suttamessa alla discussiun. Da tala vegn buca fatg diever e per consequenza vegn la gliesta declarada ligionta per la radunonza communal da questa sera.

### **1. Approvaziun dil protocol dils 21 da fevrer 2018**

Il protocol ei staus exponius sin canzlia communal sco era sin la pagina d'internet dalla vischnaunca. Dalla discussiun vegn fatg negin diever. Il protocol dalla davosa radunonza communal vegn per consequenza approbaus entras tscherna unanima.

### **2. Revisiun parziala plan da zonas Ruast**

El fegl uffical dalla Surselva sco era en quel dil cantun ha giu liug la publicaziun publica dalla revisiun parziala dil plan da zonas Ruast. En in rapport accumpignont dalla planisadra Madeleine Grob ei informau detaglidamein tgei che vegn revediu e daco

quella revisiun parziala sto vegnir fatga. Madeleine Grob informescha la radunonza detagliadamein sur da quella revisiun.

La damonda vegn suttamessa alla discussiun, da tala vegn buca fatg diever. Cun tscharna unanima vegn la revisiun parziala dil plan da zonas Ruast approbada sco la suprastonza ed il cussegl da vischnaunca han proponiu.

### **3. Revisiun parziala plan da zonas Tschuppina**

El feagl official dalla Surselva sco era en quel dil cantun ha giu liug la publicaziun publica dalla revisiun parziala dil plan da zonas Tschuppina. En in rapport accumpignont dalla planisadra Tanja Bischofberger ei informau detagliadamein tgei che vegn revediu e daco quella revisiun parziala sto vegnir fatga. Madeleine Grob informescha la radunonza detagliadamein sur da quella revisiun.

La damonda vegn suttamessa alla discussiun, da tala vegn buca fatg diever. Cun tscharna unanima vegn la revisiun parziala dil plan da zonas Tschuppina approbada sco la suprastonza ed il cussegl da vischnaunca han proponiu.

### **4. Preventiv e quen d'investiziun 2019**

Il preventiv siara suenter expensas da frs. 11'654'500 ed entradas da frs. 12'389'519 cun in surpli entradas ell'altezia da frs. 735'019. Quei preventiv ei vegnius fatgs la secunda gada suenter il niev model da quen MAC2, ed aschia sa quei preventiv mo per part vegnir cumparegliaus cun quel dil davos onn. Il quen d'investiziun preveda expensas da frs. 3'960'000 ed entradas da frs. 660'000. Las investiziuns netto muntan per consequenza a frs. 3'300'000.

Il president communal resumescha il preventiv dil quen current sco era il quen d'investiziun e dat sclariments necessaris tier diversas posiziuns. Allas damondas tschentadas vegn dau risposta. Ils presents approbeschan il preventiv sco era il quen d'investiziun 2019 cun tscharna unanima e senza resalvas.

Suenter l'approbaziun presenta il president aunc il plan da finanzas per ils proxims treis onns. Quei plan ei in instrument da lavur per la suprastonza ed aschia semida quel ualti spert. La radunonza pren enconuschientscha il plan da finanzas dils proxims treis onns.

### **5. Pei da taglia 2019**

Mintg'onn han il cussegl da vischnaunca e la radunonza communal la pusseivladad da fixar il pei da taglia. Cun la fusiun ei il pei da taglia dalla vischnaunca da Breil vegnius fixaus sin 100% dalla taglia cantunala. La taglia sin schischom sto tenor lescha da taglia vegnir fixada mintg'onn da niev. Quella taglia importa denter 1.5 entochen 2.0 promils. Il cussegl sco era la suprastonza communal fan la proposta da restar sco tochen dacheu sin 1.7 ‰ promils.

La damonda vegn suttamessa alla discussiun. Ord il miez vegn giavischau che la suprastonza pondereschi da reducir egl avegnir il pei da taglia. Per uonn vegn denton fatg negina proposta. La suprastonza vegn a sclarir sch'ina reducziun vegn en damonda proximamein. Cun tscharna unanima decida la radunonza communal da fixar il pei da taglia ordinari sin 100% dalla taglia cantunala semplia ed il pei dalla taglia sin schischom sin 1.7‰, aschia sco la suprastonza ed il cussegl da vischnaunca havevan proponiu.

## 6. Varia

Clau Schlosser informescha la radunonza sur dil suandont:

- Duront il temps d'unviern vegnan differentas fontaunas d'aua tschentai giu, quei per spagnar empau aua.
- El proxim onn entscheiva l'emprema etappa vid la via da Meglieraziun (Via Quader)
- La publicaziun dil project dalla via da colligiazion Breil-Vuorz duess succeder egl avrel 2019.
- Clau gratulescha a Luzi Pfister che ei vegnius elegius sco niev president dil cussegl da vischnauna per il proxim onn ed a Prisca Sgier che ei elegida sco vice-presidenta. El engrazia al Maurus Tomaschett per la lavur prestada sco president dil cussegl.

Clau Schlosser engrazia per la presenza, la partecipaziun e la confidonza. El siara la radunonza allas 21:20 uras e giavischa a tuts in bien retuorn a casa.

Breil, 3 da december 2018

**Il president**

*Clau Schlosser*

**Igl actuar**

*Curdin Cadonau*